



Peter Olsen, Inuit Ataqtigiit
Inatsisartuni ilaasortaq
/Maani

TELE-POST-ip namminersortunngortinneqarnissaa pillugu § 37 naapertorlugu
apeqqummut akissut

Brevdato: 21-07-2015
Sags nr. 2015-116422
Dok. nr. 2016146

Asasara Peter Olsen,

Aallarniutigalugu apeqqutitit pillugit qutsavigerusuppakkit.

Inatsisartut suleriaasianni § 37 naapertorlugu TELE-POST-ip
namminersortunngortinneqarnissaa pillugu Naalakkersuisunut arlalinnik
apeqquteqarputit. Apeqqutitit uannit akisassanngorlugit innersuunneqarput.

Postboks 909
3900 Nuuk
Tlf.: (+299) 34 50 00
Fax: (+299) 32 52 86
E-mail: isan@nanoq.gl
www.naalakkersuisut.gl

Paasissutissanik, apeqqutinnut akissutissamut atugassanik
Nalunaarasuartaateqarnermut Aqutsisoqarfimmut aamma TELE-POST-imut
pissarsiniarpunga.

Apeqqutinnut akissutikka matuma kinguliani illit tulleriinnilersuinerit malillugu
takuneqarsinnaapput. Pingaarnertut erseqqissaatigissavara, TELE-POST-ip
namminersortunngortinneqarnissaanik, taamaallunilu ingerlatseqatigiiffiup
namminersortunut tunniunneqarnissaanik Naalakkersuisut pilersaaruteqanngimmata.
Piffissami kingullermi oqallinneq namminersortunngortitsinissaq pineqarani
ammanerulersitsinissaq pineqarnerusimammat, tamanna tunngavigalugu apeqqutitut
akissuteqarpunga. Akissutit ilaat Jens-Erik Kirkegaardip § 37 naapertorlugu
nalunaarasuartaateqarnermi namminersortunngorsaneq pillugu apeqqutaanut 2015-
168-imut akissutigineqartunut assingussapput, apeqqutit assigiikannermata.

1. Tele Greenland A/S-ip namminersortunngorsarneqarnissaa qanga aaliangiunneqarpa sumullu killippa?

Namminersorlutik Oqartussat suli TELE-POST-imi aktiat 100%-ii pigisaraat,
taamaattumillu ingerlatseqatigiiffik namminersortunngortinneqarsimangilaq, aammalu
tamanna pillugu aalajangersimasunik pilersaaruteqartoqanngilaq.

Matuma kinguliani allaaserineqartut ammanerulersitsinissamik sulissutiginninnermut
tamatumunngalu pilersaarutaasunut tunngasuupput.

Naalakkersuisut 2013-imi ukiakkut nalunaarasuartaateqarnermik
inuussutissarsiteqarnermut Inatsisartut takorluugaannik, 2006-imi
nalunaarasuartaateqarnermut peqqussutip akuerineqarneranut atatillugu
oqaasertalerneqartunik piviusunngortitsinissamut periarfissat misissuiffigalugit
aallartippaat. Sulinermi nalunaarasuartaateqarnermik niueruteqarnerup
attaneqarsinnaasumik unammillerfiunissaata qulakkeerneqarnissaa Naalakkersuisunit

pingaarnertut anguniarneqarpoq. Suliamut TELE-POST, Inu:IT, Comby aamma Peqqissutsimut Attaveqaateqarnermullu Naalakkersuisoqarfik ilaatinneqarput, aammalu naalakkersuisoqarfik Copenhagen Economics-imi siunnersortinit ikiorneqarpoq. Suliap inernerisaatut suliniut "Nalunaarasuartaateqarnermi namminersortunngorsaanissamut sinaakktissat", nalunaarasuartaateqarnermi nalerassanik aalajangersaaffiusoq pilersinneqarpoq.

2009-mi Naalakkersuisut aalajangerput, atortut ledningeqanngitsut, ilaatigut nalunaarasuartaateqarnermi internetimik atuisinnaanermut, kiisalu atortut ledningeqanngitsut atorlugit atuisinnaanermut attaveqaataasut atorlugit attaveqarsinnaanermik niueruteqarneq ammanerulersinneqassasoq. Tamatuma kingunerisaanik sullissisut nutaat sullissisup nammineerluni atortunik ledningeqanngitsunik atuisinnaanermut attaveqaatai imaluunniit ledningeqanngitsunut attaveqaatit allat, sullissisup akuersissummik pigisaqartumut sullissisumulluunniit atortut ledningeqanngitsut atorlugit atuisinnaanermut akuersissuteqartut atuisinnaanermik pisiffigisai aqqutigalugit internetikkut sullissinernik neqerooruteqarsinnaalissapput.

2014-imi suliniut "Nalunaarasuartaateqarnermi namminersortunngorsaanissamut sinaakktissat" tunngavigalugit Naalakkersuisut aalajangerput, internetikkut sullissinernut qarasaasiatigullu sullissinernut niuerfiit ammanerulersinneqarnerisigut nalunaarasuartaateqarnermi niuerfinnik ammanerulersitsinissamik aallartinneqarsimasumik nangitsiniarlutik. Ammanerulersitsinissamik sulissutiginninneq 1. november 2014-imi aallartinneqarpoq. Taamatut aalajangiinerup kingunerisaanik sullissisut nutaat akuersissummik pigisaqartumut atugassarititaasut assinginik atugassaqartinneqarlutik, internetikkut qarasaasiatigullu sullissinerni qinigassanut amerlasuunut atuisut kiffartuunneqarnerini unammillersinnaalerput. Attaveqaatini kabelilersukkani ledningeqanngitsunilu unammillertoqarsinnaavoq. Kisiannili attaveqaatit kabelilersukkat Namminersorlutik Oqartussat kisermaassisinnaatitaanerata aammalu TELE-POST-imut akuersissutip ataaniiginnassapput. Nalunaarasuartaateqarnermi attaveqaatit ammanerulersinneqarnissaannik Naalakkersuisut aalajangersimasunik pilersaaruteqanngillat. Taamaattumik sullissisunngortussat nutaat, attaveqaatinik kabelilersukkanik atuinissamik kissaateqartut TELE-POST-ip attaveqaataanik ataatsimut atuisinnaanissamik pisisariaqartassapput.

Mobilinut telefoniinnarnullu attaveqaatini nalunaarasuartaatitigut sullissinernik ammanerulersitsinissaq inuiaqatigiinnut iluaqutaassanersoq pillugu 2016-imi aammalu nalunaarasuartaatitigut sullissinerit sinnerinik 2018-imi misissuinissamik Naalakkersuisut pilersaaruteqarput.

- 2. Tele Greenlandip namminersortunngorsarneqarnera Nuup avataani atuisartunut siunissami qanoq kinguneqassava?**
 - a. Atuisartunut Nuup avataaniittunut akisunerulersitsissava?**
 - b. Atugassarititaasut ajornerulissappat?**

Ammanerulersitsinermik sulissutiginninneq ingerlanneqarnissaa, taamaalillunilu sullitanut akornutaasumik akit qaffariataannginnissaat Naalakkersuisunut pingaaruteqarpoq. Ammanerulersitsineq inuiaqatigiinnut kalaallinut tamarmiusunut

iluaqutaassaaq, aammalu nammaqatigiinnermut ullumikkut ilisimasarput pigiinnarneqassalluni.

Oqaatigineqareersutut nalunaarasuartaateqarnermi mobilinut telefoniinnarnullu sullissinerit 2016-imi, aamma nalunaarasuartaatitigut sullissinerit allat 2018-imi ammanerulersinneqarnissaat inuiaqatigiinnut iluaqutaasinnaassanersoq pillugu misissuinissamik Naalakkersuisut pilersaaruteqarput.

Ammanerulersitsinissamik aalajangiineroreersumi misilittakkat malillugit illoqarfiit nunaqarfiillu, radiokædemut attaveqartut ammanerulersitsinermik suliaqarnerup kingunerisaanik akit apparnerinik/tunisassiat pitsaanerulernerinik misigisaqareerput. Atuinerup annertusingaatsiarnera aammalu Nalunaarasuartaateqarnermut Aqutsisoqarfiup 2012-imi attaveqaatinik atuinermi amerlasuukkaaraluni akinik iluarsiienerata kingunerisaanik, radiokædeqarfimmi tamarmiusumi internetimut sullissinernik pilersuinnermut aningaasartuutit apparsimapput. Aningaasartuutit apparnerat pissutigalugu TELE-POST flat-rate-mut tunisassianik nutaanik, kiisalu tunisassianik, ataatsimoortukkaani paasissutissanik amerlanerusunik imaqartunik neqeroorteqarsinnaalerpoq. Taamaattumik ammanerulersitsinissamik sulissutiginnineq atuisunut illoqarfinni annerneru najugaqartunut iluaqutaaginnanngilaq, aammali innuttaasut amerlanersaannut pitsaasunik sunniuteqarpoq.

Mobilinut telefoniinnarnullu attaveqaatinik 2016-imi ammanerulersitsisoqassappat, tamatumunnga atatillugu nalunaarasuartaatitigut sullissinermi ammanerulersinneqartumi ataatsimi amerlanerusuniluunniit, niuerfinni niuerneru tunngaveqarluni sullissinerup qaffasissusaannik kissaatigineqartumik pilersuiffiusinnaanngitsutut naatsorsuutigineqartuni pilersuisussaataitaalluni tuniniagaqartussamik ataatsimik amerlanerusunilluunniit Naalakkersuisut toqqaassapput. Pilersuisussaataitaalluni tuniniagaqartussamik toqqaanermut atatillugu Naalakkersuisut pilersuisussaataitaasup sullissinermut atortuinut atuuffiinullu, kiisalu nunami sumiiffinnut pilersuisussaataitaaffiusunut maleruagassamik aalajangersaassapput.

Pilersuisussaataitaalluni tuniniaasussatut toqqarneqartoq pilersuisussaataitanerup kingunerisaanik amigartoorutini uppernarsarneqarsimasut tamaasa matussusertissallugit pisinnaatitaaffeqassaaq. Nalunaarasuartaateqarnermik suliassaqarfimmiit pilersuisussaataitaneru amigartoorutaasinnaasut aningaasalersorneqassapput. Akitsuut sullissisunut tamanut ungasianiit attaveqaatigiinnermik atuinerat tunngavigalugu nammaqatigiiffiusumik akilersinneqartassaaq.

Taamaalilluni sumiiffinni ammanerulersitsinissamut tunngavissaqartuni sunniutissat pitsaasuusinnaasut atorluarneqarnissaat, tamatumalu peqatigisaanik nuna tamakkerlugu nalunaarasuartaatitigut attaveqaatit ineriartortinneqarnissaat qulakkeerneqassaaq.

3. Tele Greenlandip namminersortunngorsarneqarnera avannaani søkabelip pilersinneqarnissaanut qanoq sunniuteqassava?

Ammanerulersitsisoqassagaluarpat taamaattoqassanngikkaluarpalluunniit immap naqqatigut kabelip tallineqarnissaa inuiaqatigiinnut pitsaasumik sunniuteqartussaavoq. Kisiannili unammillertoqarnera amerlaneritigut pisinnaasanik atuinerup

pitsaanerulerneranik kinguneqartarpoq, taamaattumillu immap naqqatigut kabelip aningaasaqarneranut pitsaasumik sunniuteqartussaalluni.

Nalunaarasuartaateqarnermi niueruteqarneq attaveqaatit immikkoortui malillugit agguagaavoq akeqartinneqarlunilu, taamaattumillu immikkoortunut pingasunut avitaavoq, tassalu immap naqqatigut kabeleqarfik, radiokædeqarfik aamma qaammataasaqarfik. Immap naqqatigut kabelip tallineqarnerani innuttaasunit amerlanerujussuit, tassalu pingajorarterutiniit pingajorarterutinut marlunnut, tunisassianik piginnaaneqarnerusunik sukkanerusunillu, maanna Nuummi Qaqortumilu innuttaasut atugaasa assiginik atuisinnaalissapput. Kiisalu pilersuinerup isumannaassusaa annertunerulissaaq, immap naqqatigut kabeli radiokædelu ataatsikkut ingerlasussaammata.

Soorunami tamatuma kingunerisaanik TELE-POST taarsigassarsisariaqassaaq anngaasalersuinerumullu aningaasartuutai amerlanerulissallutik.

4. Allamik/nik søkabel'ip saniatigut periarfissaqarpa - suut? (satellit imlt. alla) Periarfissaqarsimappat:

- a. Qanoq naleqassangatinneqarpa?
- b. Qanoq pilertortigisumik allartissinnaava?

Immap naqqatigut kabelip saniatigut periarfissatuaasut allat tassaapput radiokædekkut imaluunniit qaammataasakkut aaqqiinissat, taakkulu pisinnaasaasa killeqarnerat pissutigalugu atuinissamik piumasaqarneq suli annertusiartortoq naammassineqarsinnaanngilaq. Radiokædekkut imaluunniit qaammataasakkut aaqqiissutit annertusineqassagunik akisunerussapput, taamatullu ingerlatsinermut aningaasartuutit qaffasissorujussuullutik. Atuinerup annertusiartornera ullumikkut atuuttoq tunngavigalugu immap naqqatigut kabelip tallineqarnissaa aaqqiissutissani pitsaanerpaassaaq. Tallineqarnerani radiokædekkut qaammataasakkullu attaveqaatit oqilisaanneqassapput, aammalu radiokædeqarfiit qaammataasaqarfiillu sinnerini atuinerup annertusinissaat ammaanepqassaluni.

Maannamut pilersaarutaasut malillugit immap naqqatigut kabeli Maniitsoq Sisimiullu aqutugalugit Aasiannut tallineqassaaq. Iluliaqartarnera pissutigalugu immap naqqatigut kabelip avannarparneqarnissaa pitsaanngimmat, radiokæde sukkaasoq Aasianniit Qasigianguit aqqusaarlugit Ilulissanut avannamut tallineqassaaq, taannalu immap naqqatigut kabelimik toqqaannartumik atuisinnaanertut sukkaasuseqassaaq. Kiisalu illoqarfinni immap naqqatigut kabeleqarfissani illoqarfiit attaveqaataat piorsarneqassapput, innuttaasut taamaallutik immap naqqatigut kabeli tamakkiisumik iluaqutigisinnaalissallugu. Tamatuma saniatigut radiokædeqarfiup Uummannamiit Upernavimmut tallineqarnissaa naatsorsuutigineqarpoq.

Immap naqqatigut kabelip il.il. 2016-imi ingerlalnissaa maannarpiaq naatsorsuutigineqarpoq.

5. Tele Greenlandip namminersortunngorsaneqarnerata kingunerisaanik Nuup avataani atuisartut ajornerusumik atugassaqalernissaat pinaveersaarniarlugu naalackersuisut qanoq pilersaaruteqarpat?

Inussiarnersumik apeqqut 1-imut aamma 2-mut akissutit innersuussutigissavakka.

6. Tele Greenland A/S-ip namminersortunnorsarneqarnera unitsinneqaraluarpat uagutsinnut namminersorlutik oqartussanut qanoq kinguneqarsinnaava qanorlu naleqassava?

A. Taarsiiffigineqarnissamik piумаqateqarfigineqarsinnaavugut?

B. Isumaqtigiissutitigut qanoq pituttuisoqarnikuua?

2016-imi aamma 2018-imi ammanerulersitseqqinnissat inuiaqatigiit aningaasaqarnerannut iluaqutaassanersoq pillugu misissuinissamut taamaallaat pilersaaruteqartoqarpoq. Ammanerulersitsinissamik sulissutiginninneq politikikkikut aalajangiiffigineqarsimanngilaq, taamaattumillu sulii annertunerusumik ammanerulersitsisoqassanersoq taamaaliortoqassannginnerluunniit Namminersorlutik Oqartussat namminneerlutik aalajangiuttussaavaat, tamannalu tunngavigalugu taarsiiffigineqarnissamik piumasaqartoqarsinnaanngilaq.

Taamaattorli inuiaqatigiit aningaasaqarnerannik misissuinerni paasineqarpat, annertunerusumik ammanerulersitsinissaq inuiaqatigiit aningaasaqarneranni iluanaarutaasinnaasoq, soorunami iluanaarutissat taakku nunatta annaassavai, taamaalillunilu ammanerulersitseqqittoqanngippat toqqaannanngitsumik annaasaqassalluni.

Inussiarnersumik inuulluaqqusillunga

Knud Kristiansen